



武元衡集卷下

七言律詩

送崔判官使太原

勞君車馬此逡巡我與劉君本世親  
兩地山河分節制十年京洛共風塵  
笙歌幾處胡天月羅綺長留蜀國春  
報主未由須盡敵煙塵萬里寶刀新

幕中諸公有觀獵之作因繼之

刀州城北劍山東甲士屯雲騎散風旌  
旆遍張林嶺動豺狼驅盡寒垣空啣蘆  
遠鴈愁縈繳繞樹啼猿怯避弓爲報  
府中從事說燕然未勒莫論功

同幕中諸公送李侍御歸朝

昔年專席奉清朝今日持書即舊僚  
珠履會中簫管思白雲歸處帝鄉遙  
巴江暮雨連三峽劍壁危梁上九霄  
歲月不堪相送盡顏顏更被別離凋

送張諫議歸朝

詔書前日下丹霄頭戴儒冠脫皂貂  
笛怨柳營烟漠漠雲秋江館雨蕭蕭  
鴛鴻得路爭先翥松栢凌寒獨後凋  
歸去朝端如有問玉關門外老班超

酬嚴司空荆南見寄

金貂再領三公府玉帳連封萬戶侯  
簾捲青山巫

峽曉煙開碧樹渚宮秋劉崑坐嘯風清塞  
謝朓題詩月滿樓白雪調高歌不得美人南望翠蛾愁

南徐別業早春有懷

生涯擾擾竟何成自愛深居隱姓名  
遠鴈臨空翻夕照殘雲帶雨過春城  
花枝入戶猶含潤泉水侵堦乍有聲  
虛度年華不相見離腸懷土併關情

摩訶池宴

摩訶池上春光早愛水看花日日來  
穠李雪開歌扇掩綠楊風動舞腰回  
蕪臺事往空留恨金谷時危悟惜才  
晝短欲將清夜繼西園自有月徘徊

至櫟陽崇道寺聞嚴十少府趨侍

雲連萬木夕沉沉草色泉聲古院深聞說羊車趨  
盛府何言瓊樹在東林松筠自古多年契風月懷  
賢此夜心惆悵送君身未達不堪搖落聽秋砧

春暮郊居寄朱舍人

幽深不謝子真居度日間眠世事踈春水滿池新  
雨霽香風入戶落花餘日隨鴻鴈窮蒼翠心寄溪  
雲任卷舒回首知音青鎖闥何時一為薦相如

送温况游蜀

遊人西去客三巴身逐孤蓬不定家山近峨眉飛

暮雨江連濯錦起朝霞雲深九折刀州遠路繞千  
巖劍閣斜因到嚴君開卦處將余一為問生涯

崔敷歎春物將謝恨不同覽時余方為事

牽束及往尋不遇題之留贈

九陌遲遲麗景斜禁街西訪隱淪賒門依高柳空  
飛絮身逐閒雲不在家軒冕強來趨世路琴樽空  
負賞年華殘陽寂寞東城去惆悵春風落盡花

秋燈對雨寄史近崔積

坐聽宮城傳晚漏起看衰葉下寒枝空庭綠草結  
離念細雨黃花贈所思蟋蟀已驚良節度茱萸偏

憶故人期相逢莫厭樽前醉春去秋來自不知

春題龍門香山寺

衆香天上梵仙宮鐘磬寥寥半碧空清景乍開松  
嶺月亂流長嚮石樓風山河杳映春雲外城闕參  
差茂樹中欲盡出尋那可得三千世界本無窮

酬陸三與鄒十八侍御

城分流水郭連山拂露開懷一解顏令史中關仙  
史會河陽縣裏玉人閑共憐秋隼驚飛至久想雲  
鴻待侶還莫恨殷勤留此地東崖桂樹昔同攀

酬談校書長安秋夜對月寄諸故舊

故園千里渺遐情黃葉蕭條白露生驚鵲逸枝風  
滿幌寒鐘送曉月當楹蓬山高價傳新韻槐市芳  
年挹盛名莫恠孔融悲歲序五侯門館重婁卿

送田三端公還鄂州

孤雲迢遞戀滄洲勸酒梨花對白頭南陌送歸車  
騎合東城怨別管絃愁青油幕裏人如玉黃鶴樓  
中月並鈎君去庾公應借問馳心千里大江流

送李秀才赴滑州詣大夫舅

陌頭車馬去翩翩白面懷書美少年東武揚公姻  
婭重西州謝傅舅甥賢長亭叫月新秋鴈官渡含

風古樹蟬知已滿朝留不住貴臣河上擁旌旃

秋日書懷

金貂玉鉉奉君恩夜漏晨鐘老掖垣參決萬機空  
有愧靜觀群動亦無言杯中壯志紅顏歇林下秋  
聲絳葉翻倦鳥不知歸去日青蕪白露滿郊園

奉酬嚴司空荊州見寄

漢家征鎮委條侯虎節龍旌居上頭簾捲青山巫  
峽曉煙開碧樹渚宮秋金笳曾掩故人淚麗句初  
傳明月樓白雪調高歌不得陽臺相顧翠蛾愁

五言絕句

途中即事

南征復北還擾擾百年間自笑紅塵裏生涯不暫  
閒

春日偶作

縱橫桃李枝淡蕩春風吹美人歌白苧莫恨在蛾  
眉

夏夜作

夜久喧暫息池臺惟月明無因駐清景日出事還  
生

左掖梨花

巧笑解迎人晴雪香堪惜隨風蝶影翻誤點朝衣  
赤

同陳侍御寒食遊禪藏山上人院

年少輕行樂東城南陌頭與君寂寞意共作草堂  
遊

七言絕句

贈佳人

步搖金翠玉搔頭傾國傾城勝莫愁若逞仙姿遊  
洛浦定知神妬謝風流

休暇日中書相公致齋禁省因以寄贈

嘗聞聖主得賢臣三接能令四海春月滿禁垣齋  
沐夜清吟屬和更何人

春興

楊柳陰陰細雨晴殘花落盡見流鶯春風一夜吹  
香夢又逐春風到洛城

酬裴起居西亭留題

艷歌能起關山恨紅燭遙凝邊塞情況是池塘風  
雨夜不堪絃管盡離聲

送張侍御赴京

江南風雨塞鴻飛西府文章謝掾歸相送河州蘭

棹晚菱歌一曲淚盈衣

鄂渚送友

雲帆淼淼巴陵渡  
煙樹蒼蒼故郢城  
江上梅花無數落  
送君南浦不勝情

送裴戡行軍

珠履三千醉不歡  
玉人猶苦夜米寒  
送君偏有無言淚  
天下關山行路難

宿青陽驛

空山遙落三秋暮  
螢過疎簾月露圓  
寂寞銀燈愁不寐  
蕭蕭風竹夜窓寒

送崔舍人起居

赤墀同拜紫泥封  
駟牡連徵侍九重  
惟有白鬚張司馬  
不言名利尚相從

路岐重賦

芳郊欲別闌干淚  
故國難期聚散雲  
分手更逢江驛暮  
馬嘶猿嘯不堪聞

重送盧三十一居

相如擁傳有光輝  
何事闌干淚濕衣  
舊府東山餘妓在  
重將歌舞送君歸

重送張諫議



漢庭從事五人來回首疆場獨未回今日送君魂  
斷處寒雲寥落數株梅

同諸公夜讌監軍翫花之作

五侯門館百花繁紅燭搖風白雪翻不似鳳凰池  
畔見飄揚今隔上林園

郊居寓目偶題

晨移禁掖暮郊園松桂蒼蒼烟露繁明月上時群  
動息雪峰高處正當軒

題嘉陵驛

悠悠風旆繞山川山驛空濛雨似烟路半嘉陵頭

已白蜀門西上更青天

送柳郎中裴起居

望鄉臺上秦人在學射山中杜魄哀落日河橋千  
騎別春風寂寞旆旌迴

秋日出遊偶作

黃花丹葉滿江城暫愛江頭風景清閒步欲舒山  
野性貔貅不許獨行人

夏夜餞裴行軍赴朝命

三年同看錦城花銀燭連宵照綺霞報國從來先  
意氣臨岐不用重咨嗟

摩訶池送李侍御之鳳翔

柳暗花明池上山高樓歌酒換離顏他時欲寄相思字何處黃雲是隴間

重送魏正則擢第歸江陵

商山路接玉山深古木蒼然盡合陰會府登筵君最少江城秋至肯驚心

登闔閭古城

登高望遠自傷情柳發花開映古城全盛已隨流水去黃鸝空轉舊春

尋三藏上人

北風吹雪暮蕭蕭問去尋僧上界遙臨水手持筇竹杖逢君不語指芭蕉

山居

方依泉壑將時背路入煙蘿得地深終歲不知城郭事手栽林竹盡成陰

長安賊中寄題江南所居茱萸樹

手種茱萸舊井傍幾回春露又秋霜今來獨向秦中見攀折無時不斷腸

春齋夜雨憶郭通微

桃源在在阻風塵世事悠悠又遇春雨滴閑堦清

夜久焚香偏憶白雲人

送嚴秀才赴舉

灞澹別離腸已斷江山迢遞信仍稀  
送君偏下臨歧淚家住南州身未歸

春日酬熊執易南亭花發見贈

千株桃杏參差發想見花時人却愁  
堂忝陸機琴酒會春亭惟願一淹留

中春亭雪夜寄西隣韓李二舍人

廣庭飛雪對愁人寒由來不悟春却笑  
山陰乘興夜何如今日戴家隣

立秋日與陸華原於縣界南館送鄒十八

風入昭陽池館秋片雲孤鶴兩難留  
明朝獨向青山郭唯有蟬聲催白頭

酬韋胄曹登天長寺上方見寄

青山幾度沾襟淚併在東林雪外峰  
今日重煩相憶處春光花繞鳳池濃

陌上春暮

青青南陌柳如絲柳色鶯聲晚日遲  
何處最傷遊客思春風三月落花時

春日偶作

飛花寂寂燕雙雙南客衡門對楚江惆悵管絃何處發春風吹到讀書窓

春暮寄杜嘉興昆弟

柳色千家與萬家輕風細雨落殘花數枝瓊玉無由見空掩柴扉度歲華

淮渡

暮濤凝雪長淮水細雨飛梅五月天行子不須愁夜泊綠楊高處有人烟

與崔十五同訪裴校書不遇

梨花落盡柳花時庭樹流鶯日過遲幾度相思不

相見春風何處有佳期

夏日寄陸三達陸四逢并王念八仲周

士衡兄弟舊齊名還似當年在洛城聞說重門方隱相古槐高柳夏陰清

秋原寓目

木落風高天宇開秋原一望思悠哉邊城今少射雕騎連鴈嗷嗷何處來

贈歌人

林鶯一啣四時春蟬翼羅衣白玉人曾逐使君歌舞地清聲長咽翠眉顰

同苗郎中送嚴侍御赴黔中因訪仙源之事

武陵源在朗江東流水飛花仙洞中莫問阮郎千古事綠楊深處翠霞空

使次盤豆驛

山川不記何年別城郭應非昔所經欲駐征車終日望天河雲雨晦冥冥

緱山道中口號

秋山寂寂秋水清寒郊木葉飛無聲王子白雲仙去久洛濱行路夜吹笙

歲暮送舍人

邊城歲暮望鄉關方逐戎旌未得還欲別臨岐無限淚故園花發寄君攀

寓興呈崔員外諸公

三月楊花飛滿空飄颻十里雪如風不知何處香醪熟願醉佳園芳樹中

單于曉角

胡兒吹角漢城頭月皎霜寒大漠秋三奏未終天便曉何人不起望鄉愁

汴河聞笛

何處金笳月裏悲悠悠邊客夢先知單于城下關  
山曲今日中原總解吹

塞上春懷

東風河外五城喧南客征袍滿淚痕愁至獨登高  
處望藹然雲樹重傷魂

塞月夜寄荆南熊侍御

南依劉表北劉琨征戰年年簫鼓喧雲雨一乖千  
萬里長城秋月洞庭猿

單于罷戰却歸題善陽館

南去善陽關身逐歸雲到處閒曾是五年蓮

府客每聞胡虜哭陰山

韋常侍以賓客致仕同諸公題壁

孤雲永日自徘徊嚴館蒼蒼遍綠苔望苑忽驚新  
詔下綵鸞歸處玉籠開

學仙難

玉殿笙歌漢帝愁鸞龍儼駕望瀛洲黃金化盡方  
士死青天欲上無緣由

唐昌觀玉蕊花

琪樹芊芊玉蕊新河宮長閉綵霞春日暮落英鋪  
地雪獻花應過九天人

春曉聞鶯

寥寥蘭臺曉夢驚  
綠林殘月思孤鶯  
猶疑蜀魄千年恨  
化作冤禽萬轉聲

聞嚴秘書與正字及諸客夜會因寄

衡門寥落歲陰窮  
露濕莓苔葉厭風  
聞道今宵阮家會  
竹林明月七人同

戲贈韓二秀才

名高折桂方年少  
心苦爲文命未通  
聞說東堂今有待  
飛鳴何處及春風

聞王仲周所居牡丹花發因戲贈

聞說庭花發暮春  
長安才子看須頻  
花開花落無人見  
借問何人是主人

酬王十八見招

王昌家直在城東  
落盡庭花昨夜風  
高興不辭千日醉  
隨君走馬向新豐

贈道者

麻衣如雪一枝梅  
笑掩微粧入夢來  
若到越溪逢越女  
紅蓮池裏白蓮開

重送白將軍

紅燭芳筵惜夜分  
歌樓管咽思難聞  
早知怨別人

間世不下青山老白雲

和李丞題李將軍林園

落英飄藥雪紛紛啼鳥如悲霍冠軍逝水不迴絃  
管絕玉樓迢遞鎖浮雲

同張惟送霍總

春風簫管怨津樓三奏行人醉不留別後相思江  
上岸落花飛處杜鵑愁

雜言

石州城

丈夫心愛橫行報國知嫌命輕樓蘭徑百戰更道

戍龍城錦字寶車騎胡笳李少卿生離兩不見萬  
古難爲情

武元衡集卷下終





